

**Bosna i Hercegovina
Federacija Bosne i Hercegovine
Federalno ministarstvo energije, rudarstva i
industrije Mostar**

**Program utroška sredstava
utvrđenih u razdjelu 17. Budžeta Federacije Bosne i Hercegovine za
2026. godinu Federalnom ministarstvu energije, rudarstva i industrije
„Kapitalni transferi javnim preduzećima-realizacija Projekta
rekonstrukcije magistralnog vrelovoda-grad Tuzla“**

Mostar, juli 2026. godine

1. UVOD

Grad Tuzla, kao treći najveći grad u Bosni i Hercegovini i sjedište kantona u Federaciji Bosne i Hercegovine (Tuzlanski kanton) broji 111.000 stanovnika, od čega na urbanom području grada egzistira 74.000 stanovnika.

Na sistem daljinskog grijanja Grada Tuzla, kojeg čini preko 200 km vrel vodne i toplo vodne mreže, spojeno je više od 28.000 korisnika.

Magistralni vrel vod služi za snabdijevanje toplotnom energijom Grada Tuzle i predstavlja vezu između termoelektrane i vrel vodne mreže grada Tuzle. Postojeći glavni magistralni vrel vod prema Gradu Tuzla je dvocijevni, nazivnog promjera cijevi DN600.

Grad Tuzla je kandidovao projekat „Rekonstrukcija magistralnog vrel voda grada Tuzle od ograde TE Tuzla do komore K1 – faza 1 (ograda TE Tuzla do priključne komore za Siporeks)“, ukupne procijenjene vrijednosti od 19.486.845 KM, s ciljem povećanja sigurnosti i stabilnosti sistema daljinskog grijanja, smanjenja distributivnih gubitaka, povećanja energetske efikasnosti i stvaranja uslova za dalje širenje sistema toplifikacije.

Potpunom realizacijom Projekta rekonstrukcije magistralnog vrel voda grad Tuzla stvaraju se preduslovi za priključenje novih korisnika na sistem daljinskog grijanja, omogućava se izgradnja novih stambeno-poslovnih objekata, produžuje vijek trajanja sistema daljinskog grijanja i u konačnici smanjuju gubici energije u transportu.

Ovaj projekat je u skladu sa Strategijom razvoja Federacije BiH 2021–2027. godine (3. Strateški cilj: Resursno efikasan i održiv razvoj, 3.2. Unaprjeđivati kvalitet zraka) i Strategijom razvoja grada Tuzle do 2026. godine (Unapređenje okoliša, 6.1.7. Širenje mreže toplifikacije).

S obzirom da se radi o velikoj investiciji, rekonstrukcija magistralnog vrel voda u dužini od cca 1.800 m podijeljena je u više faza.

U cilju realizacije prve faze, Vlada Federacije Bosne i Hercegovine, na sjednici održanoj 09.07.2024. godine, donijela je Odluku o usvajanju Programa utroška sredstava utvrđenih u razdjelu 17. Budžeta Federacije Bosne i Hercegovine za 2024. godinu Federalnom ministarstvu energije, rudarstva i industrije (u daljem tekstu Ministarstvo) „Kapitalni transferi javnim preduzećima-realizacija Projekta rekonstrukcije magistralnog vrel voda-grad Tuzla, V. broj: 1057/2024 od 09.07.2024. godine („Službene novine Federacije BiH“, broj 54/24), na iznos 10.000.000,00 KM, kao i Odluku o davanju prethodne saglasnosti za zaključenje Ugovora o dodjeli grant sredstava, V. broj: 1059/2024 od 09.07.2024. godine.

Po izvršenoj realizaciji navedenog Programa i Ugovora, a u svrhu kontrole namjenskog utroška dodijeljenih sredstava, imenovana je Komisija koja je sačinila

Konačni Izvještaj o namjenskom utrošku sredstava dodijeljenih po Programu utroška sredstava utvrđenih u razdjelu 17. Budžeta Federacije Bosne i Hercegovine za 2024. godinu Federalnom ministarstvu energije, rudarstva i industrije „Kapitalni transferi javnim preduzećima-realizacija Projekta rekonstrukcije magistralnog vrelovoda-grad Tuzla“, u kojem je konstatovano da su grant sredstva, isplaćena u ukupnom iznosu od 9,181,203.76 KM utrošena namjenski za nabavku, transport i isporuku, u Magacin Centralnog grijanja, predizoliranih cijevi, koljena, čvrstih tačaka, spojnica i aksijalnih kompenzatora potrebnih za rekonstrukciju magistralnog vrelovoda, kao dijela sistema daljinskog grijanja Grada Tuzle. Ovaj izvještaj je, putem Federalnog ministarstva energije, rudarstva i industrije upućen Vladi Federacije Bosne i Hercegovine, na razmatranje i usvajanje.

S obzirom na navedeno, Vlada Federacije BiH se opredijelila da i u Budžetu Federacije BiH za 2025. godinu Federalnom ministarstvu energije, rudarstva i industrije (u daljem tekstu: Ministarstvo) u razdjelu 17, ekonomski kod 615400 Kapitalni transferi javnim preduzećima-realizacija Projekta rekonstrukcije magistralnog vrelovoda-grad Tuzla, predvidi sredstva za dodjelu u ukupnom iznosu od 5.000.000,00 KM, kako bi se krenulo i sa realizacijom druge faze koja se odnosi na izvođenje radova na mašinskoj montaži predizoliranog cjevovoda, te građevinske radove (demontaža postojećeg cjevovoda, montaža betonskih čvrstih tačaka, oblaganje cijevi pijeskom i zatrpavanje rova) i elektro radove (spajanje signalnih vodiča).

Tokom aprila 2025. godine „Centralno grijanje“ d.d. Tuzla potpisalo je Ugovor broj 07/05-11-1-572/25 sa Federalnim ministarstvom energije, rudarstva i industrije, na osnovu kojeg su odobrena sredstva u iznosu od 5.000.000,00 KM za nastavak realizacije projekta rekonstrukcije magistralnog vrelovoda grada Tuzla.

Po izvršenoj realizaciji dijela Programa i Ugovora za 2025. godinu, a u svrhu kontrole namjenskog utroška dodijeljenih sredstava, imenovana je Komisija Federalnog ministarstva energije, rudarstva i industrije koja je izvršila kontrolu realizacije projekta i sačinila izvještaj o namjenskom utrošku sredstava dodijeljenih po Programu utroška sredstava utvrđenih u razdjelu 17. Budžeta Federacije Bosne i Hercegovine za 2025. godinu Federalnom ministarstvu energije, rudarstva i industrije „Kapitalni transferi javnim preduzećima – realizacija Projekta rekonstrukcije magistralnog vrelovoda grad Tuzla“.

U predmetnom izvještaju konstatovano je da su grant sredstva u iznosu od 3.689.119,99 KM namjenski utrošena za rekonstrukciju cca 860 m trase magistralnog vrelovoda od ČO11' do ČO20', odnosno od stacionaže 0+802,30 do stacionaže 1+669,41, te da je rekonstruisana dionica puštena u funkciju i uključena u sistem daljinskog grijanja grada Tuzla prije početka grijne sezone 2025/2026. godine.

S obzirom da dio planiranih radova nije bilo moguće realizovati u okviru prvobitno planirane dinamike izvođenja, usljed složenih infrastrukturnih, tehničkih i prostornih uslova na predmetnoj trasi, kao i potrebe očuvanja kontinuiteta i stabilnosti funkcionisanja sistema daljinskog grijanja grada Tuzla tokom trajanja grijne sezone,

ukazala se potreba za nastavkom realizacije projekta i u 2026. godini.

Uvažavajući stepen realizacije projekta ostvaren u prethodnom periodu, kao i značaj nastavka rekonstrukcije magistralnog vrelovoda za sigurnost i pouzdanost sistema daljinskog grijanja grada Tuzla, u Budžetu Federacije Bosne i Hercegovine za 2026. godinu, u razdjelu 17 Federalnog ministarstva energije, rudarstva i industrije, na ekonomskom kodu 615400 – Kapitalni transferi javnim preduzećima – realizacija Projekta rekonstrukcije magistralnog vrelovoda grad Tuzla, planirana su sredstva u ukupnom iznosu od 1.800.000,00 KM za nastavak realizacije predmetnog kapitalnog infrastrukturnog projekta.

Predmetna sredstva planirana su za realizaciju dijela preostalih radova u dužini od cca 325 metara trase, od stacionaže 0+477,30 do stacionaže 0+802,30. Radovi obuhvataju pripremne radove, montažno-demontažne radove, građevinske radove, angažovanje radnika i građevinskih strojeva, kao i opće stavke neophodne za realizaciju predmetne trase.

Napominjemo da je, shodno Odluci o komunalnim djelatnostima („Službeni glasnik Grada Tuzle“, broj 09/07), Grad Tuzla obavljanje komunalne djelatnosti snabdijevanja toplotnom energijom – proizvodnju i distribuciju toplotne energije – povjerio javnom preduzeću JKP „Centralno grijanje“ d.d. Tuzla.

Ugovorom o regulisanju međusobnih prava i obaveza u vezi sa povjeravanjem na upravljanje i korištenje javnih dobara, dobara u općoj upotrebi, nekretnina, komunalne i druge infrastrukture u vlasništvu Grada Tuzle, broj: 02/04-A-7685-2026 od 03.06.2026. godine, zaključenim između Grada Tuzle i JKP „Centralno grijanje“ d.d. Tuzla, regulisana su međusobna prava i obaveze ugovornih strana u vezi sa povjeravanjem Javnom komunalnom preduzeću prava upravljanja i korištenja javnim dobrima, komunalnom i drugom infrastrukturom izgrađenom u cilju osiguranja uslova za obavljanje komunalne djelatnosti snabdijevanja toplotnom energijom, a sve sa ciljem obezbjeđenja pružanja usluga snabdijevanja toplotnom energijom kao komunalne djelatnosti od posebnog društvenog interesa.

Predmetnim ugovorom definisana su prava i obaveze JKP „Centralno grijanje“ d.d. Tuzla u pogledu upravljanja, korištenja, održavanja i investicionog ulaganja u komunalnu infrastrukturu sistema daljinskog grijanja grada Tuzla, uključujući obavezu kontinuiranog održavanja funkcionalnosti sistema i realizacije investicionih aktivnosti usmjerenih na unapređenje sigurnosti i kvaliteta pružanja usluge snabdijevanja toplotnom energijom.

Odlukom broj: 0109/2002-3 od 17.01.2002. godine izvršena je promjena organizovanja iz javnog preduzeća u dioničko društvo „Centralno grijanje“ d.d. Tuzla, a u Rješenju o upisu promjena podataka o subjektu upisa u sudski registar broj: U/I-920/02 od 30.08.2002. godine, izdatom od strane Kantonalnog suda u Tuzli, upisane su navedene promjene.

2. PRAVNI OSNOV

- Strategija razvoja Federacije Bosne i Hercegovine 2021-2027 („Službene novine Federacije BiH“, broj 40/2022);
- Strategija razvoja grada Tuzle 2012 - 2026. godine (revidirana za period 2019.- 2021.), objavljena u Službenom glasniku Grada Tuzla, broj 2/19.

3. ZAKONODAVNI OKVIR

- Budžet Federacije Bosne i Hercegovine za 2026. godinu („Službene novine Federacije BiH“, broj 6/26);
- Zakon o izvršavanju Budžeta Federacije Bosne i Hercegovine za 2026. godinu („Službene novine Federacije BiH“, broj 6/26).

4. CILJ PROGRAMA

Cilj Programa je da „Centralno grijanje“ d.d. Tuzla, uz planiranu finansijsku pomoć u iznosu od 1.800.000,00 KM, nastavi realizaciju projekta rekonstrukcije magistralnog vrelovoda grada Tuzla kroz izvođenje dijela preostalih mašinskih, građevinskih i elektro radova na predmetnoj trasi magistralnog vrelovoda.

Napominjemo da je nabavka, transport i isporuka u magacin „Centralnog grijanja“ d.d. Tuzla predizoliranih cijevi, koljena, čvrstih tačaka, spojnica i aksijalnih kompenzatora potrebnih za rekonstrukciju magistralnog vrelovoda, kao dijela sistema daljinskog grijanja Grada Tuzla, postojećeg magistralnog vrelovoda nazivnog promjera DN600 u nadzemnoj izvedbi sa magistralnim vodom DN800 u podzemnoj izvedbi, odnosno dionice između čvrstih tačaka ČO1 (stacionaža 0,00) i ČO22 (stacionaža 1787,60), bila predmet projekta realizovanog kroz Program utroška sredstava utvrđenih u razdjelu 17. Budžeta Federacije Bosne i Hercegovine za 2024. godinu Federalnom ministarstvu energije, rudarstva i industrije „Kapitalni transferi javnim preduzećima – realizacija Projekta rekonstrukcije magistralnog vrelovoda grad Tuzla“ („Službene novine Federacije BiH“, broj 54/24).

Također, izvođenje mašinskih, građevinskih i elektro radova na dijelu trase magistralnog vrelovoda između čvrstih tačaka ČO6 i ČO22 bilo je predmet realizacije Programa utroška sredstava utvrđenih u razdjelu 17. Budžeta Federacije Bosne i Hercegovine za 2025. godinu Federalnom ministarstvu energije, rudarstva i industrije „Kapitalni transferi javnim preduzećima – realizacija Projekta rekonstrukcije magistralnog vrelovoda grad Tuzla“.

U okviru realizacije predmetnog projekta tokom 2025. godine funkcionalno je rekonstruisano cca 860 m trase magistralnog vrelovoda, od ČO11' do ČO20', odnosno od stacionaže 0+802,30 do stacionaže 1+669,41, te je rekonstruisana dionica puštena u funkciju i uključena u sistem daljinskog grijanja grada Tuzla prije početka grijne sezone 2025/2026. godine.

Predmet ovog Programa odnosi se na nastavak realizacije projekta rekonstrukcije magistralnog vrelovoda, kao dijela sistema daljinskog grijanja grada Tuzla, odnosno na izvođenje dijela preostalih radova na trasi od stacionaže 0+477,30 do stacionaže 0+802,30, u dužini od cca 325 m trase.

Realizacijom predmetnog projekta ostvaruje se funkcionalni i infrastrukturni cilj unapređenja sigurnosti, stabilnosti i pouzdanosti sistema daljinskog grijanja grada Tuzla, uz istovremeno povećanje kapaciteta magistralnog transportnog sistema toplotne energije. Rekonstrukcijom magistralnog vrelovoda stvaraju se tehnički i infrastrukturni preduslovi za dalje plansko širenje mreže daljinskog grijanja prema naseljima koja trenutno nisu obuhvaćena sistemom daljinskog grijanja, uključujući naselja Hudeč, Moluhe, Šićki Brod i druga rubna područja grada Tuzla.

Poseban značaj predmetnog projekta ogleda se u njegovom direktnom doprinosu smanjenju aerozagađenja i unapređenju kvaliteta zraka na području grada Tuzla. Upravo iz navedenih razloga, razvoj i širenje sistema daljinskog grijanja predstavlja jednu od ključnih infrastrukturnih i okolišnih mjera u procesu energetske tranzicije grada Tuzla. Rekonstrukcijom magistralnog vrelovoda stvaraju se tehnički preduslovi za dalje širenje sistema daljinskog grijanja prema naseljima koja trenutno nisu obuhvaćena sistemom, čime se omogućava postepeno smanjenje broja individualnih ložišta i smanjenje emisija štetnih materija u urbanim i prigradskim zonama grada Tuzla.

Kontinuiranim širenjem mreže daljinskog grijanja prema individualnim stambenim objektima stvaraju se dugoročni uslovi za smanjenje emisija štetnih materija, povećanje energetske efikasnosti i unapređenje komunalne infrastrukture grada Tuzla. Prema najnovijim podacima o kvalitetu zraka za 2025. godinu (IQAir, World Air Quality Report 2025), evidentno je značajno smanjenje aerozagađenja u odnosu na prethodni period, što potvrđuje opravdanost ulaganja u razvoj i širenje sistema daljinskog grijanja kao jednog od ključnih infrastrukturnih i okolišnih projekata grada Tuzla.

Realizacijom ovog projekta ostvaruju se višestruki energetske, infrastrukturne i ekološke efekti od značaja za Grad Tuzlu i Federaciju Bosne i Hercegovine, uključujući smanjenje aerozagađenja, povećanje energetske efikasnosti sistema daljinskog grijanja, smanjenje distributivnih gubitaka toplotne energije, povećanje sigurnosti i kontinuiteta isporuke toplotne energije krajnjim korisnicima, produženje životnog vijeka sistema daljinskog grijanja, kao i stvaranje preduslova za dalji razvoj održive i energetske efikasne komunalne infrastrukture.

5. KORISNICI I NAMJENA DODIJELJENIH SREDSTAVA

Korisnik sredstava po ovom Programu je „Centralno grijanje“ d.d. Tuzla.

Sredstva su namijenjena za nastavak realizacije projekta rekonstrukcije magistralnog vrelovoda, odnosno za izvođenje mašinskih, građevinskih i elektro radova na dijelu trase magistralnog vrelovoda od stacionaže 0+477,30 do stacionaže 0+802,30, u dužini od cca 325 m trase.

6. SREDSTVA PREDVIĐENA ZA DODJELU

Sredstva predviđena za dodjelu po ovom Programu čine sredstva planirana Budžetom Federacije Bosne i Hercegovine za 2026. godinu u razdjelu 17, ekonomski kod 6154 „Kapitalni transferi javnim preduzećima – realizacija Projekta rekonstrukcije magistralnog vrelovoda grad Tuzla“, u ukupnom iznosu od

1.800.000,00 KM.

Sredstva koja Federacija BiH uloži po ovom Programu knjižice se kao povećanje kapitala Grada Tuzla.

7. TRAJANJE PROGRAMA

Ovaj Program traje do utroška sredstava, odnosno do završetka radova u skladu sa tačkom 5. Programa, a najkasnije do kraja fiskalne godine.

8. TIJELA ZA PROVOĐENJE PROGRAMA

Tijela nadležna za provođenje i nadzor nad namjenskim korištenjem sredstava po ovom Programu su Federalno ministarstvo energije rudarstva i industrije, Federalno ministarstvo finansija/finansija, "Centralno grijanje" d.d. Tuzla, Grad Tuzla, svako u okviru svoje nadležnosti.

9. PROVOĐENJE PROGRAMA

Sredstva se dodjeljuju na osnovu ovog Programa i Ugovora o dodjeli sredstava, koji potpisuje Ministarstvo, sa jedne strane i "Centralno grijanje" d.d. Tuzla, kao korisnik sa druge strane.

Avansna sredstva, u visini do 10% od ukupnih sredstava predviđenih Budžetom Federacije Bosne i Hercegovine za ovaj Program, mogu se dodijeliti Centralnom grijanju d.d. Tuzla, na njihov zahtjev i ako je isto definirano u tenderskoj dokumentaciji prilikom provođenja postupka Javnih nabavki, a potom i ugovorom sa izvođačem radova.

Ugovor obavezno sadrži sljedeće elemente:

- iznos i namjenu sredstava koja se dodjeljuju

- Sredstva u iznosu od 1.800.000,00 KM namijenjena su za nastavak realizacije projekta rekonstrukcije magistralnog vrelovoda grada Tuzla, odnosno za izvođenje dijela preostalih mašinskih, građevinskih i elektro radova na dionici od stacionaže 0+477,30 do stacionaže 0+802,30, u dužini od cca 325 m trase. Predmetni radovi obuhvataju pripremne i montažno-demontažne radove, izvođenje mašinskih, građevinskih i elektro radova, angažovanje radnika i građevinskih strojeva, kao i ostale opće stavke neophodne za realizaciju predmetne trase. Planirana trasa vodi ispod mosta kod HAK-a, duž korita rijeke Jale prema ogradi Termoelektrane "Tuzla".

- dinamiku i načine doznačavanja sredstava

- sredstva će se prenositi u tranšama (sukcesivno) na poseban transakcijski račun koji će "Centralno grijanje" d.d. Tuzla otvoriti za namjene predviđene ovim Programom. Sredstva će se prenositi nakon što "Centralno grijanje" d.d. Tuzla dostavi Federalnom ministarstvu energije, rudarstva i industrije dokaze

o izvedenim radovima (pisani zahtjev za prenos sredstava, potpisan ugovor za radove, ovjerena situacija za izvedene radove, uz obavezan izvještaj nadzornog organa).

- U slučaju da je ugovorom za radove predviđeno avansno plaćanje, prva tranša će se doznačiti nakon što "Centralno grijanje" d.d. Tuzla dostavi Ministarstvu zahtjev za prenos sredstava i potpisan ugovor za radove, u kojem je definisan iznos avansa.

- obavezu korisnika sredstava

- „Centralno grijanje“ d.d. Tuzla će od nadležnog organa ishodovati odobrenje za gradnju,
- „Centralno grijanje“ d.d. Tuzla će pripremiti tendersku dokumentaciju i provesti postupak javne nabavke, u skladu sa Zakonom o javnim nabavkama,
- Nakon izbora najpovoljnijeg ponuđača/izvođača radova, „Centralno grijanje“ d.d. Tuzla će sklopiti sa istim ugovor, kojim će biti definisana sva prava i obaveze ugovorenih strana (Ugovor će sadržavati sve detalje vezane za izvođenje, plaćanje, kvalitet radova, rokove, bankovne garancije za dobro izvršenje posla i dr.),
- „Centralno grijanje“ d.d. Tuzla će osigurati stručni nadzor u skladu sa Uredbom o uređenju gradilišta, obaveznoj dokumentaciji na gradilištu i sudionicima u građenju („Službene novine Federacije BiH“, br. 25a/22, 42/22, 93/22 i 33/24), na način da će pripremiti tendersku dokumentaciju i provesti proceduru javnih nabavki u skladu sa Zakonom o javnim nabavkama za izbor nadzornog organa, te sa odabranim ponuđačem zaključiti ugovor o vršenju stručnog nadzora, vodeći računa da poslove stručnog nadzora ne može obavljati pravno lice koje je izradilo ili učestvovalo u izradi ili kontroli (reviziji) investiciono-tehničke dokumentacije i pravno lice koje izvodi radove,
- „Centralno grijanje“ d.d. Tuzla će uz zahtjev za prenos sredstava prema Ministarstvu dostaviti svu potrebnu dokumentaciju (potpisan ugovor za radove, potpisan ugovor za nadzor, ovjerenu situacija za izvedene radove i izvještaj nadzornog organa)
- „Centralno grijanje“ d.d. Tuzla izvršiće plaćanje po ovjerenim situacijama/fakturama izvođaču za izvršene radove, a dokaz o izvršenim uplatama za svaku situaciju dostaviti Ministarstvu
- „Centralno grijanje“ d.d. Tuzla se obavezuje da će izvršiti sve pripremne radove na rekonstrukciji magistralnog vrelovoda.

Nakon što se izvrše radovi (mašinski, građevinski i elektro), i vrelovod bude pušten u funkciju, Ministarstvo može konstatovati da je cilj utvrđen Programom ispunjen. U slučaju da iznos sredstava potrebnih za rekonstrukciju ove faze magistralnog vrelovoda premaši iznos sredstava planiranih za dodjelu ovim programom (1,8 miliona KM) „Centralno grijanje“ d.d. Tuzla i Grad Tuzla se obavezuje da obezbijede

nedostajuća sredstva za potpunu realizaciju ove faze projekta i nadzora.

10. KONTROLA UTROŠKA DODIJELJENIH SREDSTAVA

U svrhu kontrole namjenskog utroška dodijeljenih sredstava korisnik je dužan provesti odobrenu investiciju i izvještavati Ministarstvo (najmanje jedanput u toku izvođenja radova) u skladu sa potpisanim Ugovorom i dostaviti Ministarstvu Izvještaj o provođenju odobrene investicije sa prikazom i učincima izvršenih radova i to najkasnije u roku od 30 dana, nakon završetka radova, odnosno dodjele sredstava po okončanoj situaciji.

U svrhu kontrole namjenskog utroška dodijeljenih sredstava, federalni ministar energije, rudarstva i industrije, Rješenjem imenuje Komisiju za kontrolu namjenskog utroška sredstava koja radi u skladu sa Programom i potpisanim Ugovorom, i dužna je sačiniti Zapisnik i Izvještaj o utrošku sredstava. Izvještaj o utrošku sredstava se putem Ministarstva dostavlja Vladi Federacije Bosne i Hercegovine na razmatranje i usvajanje.

Ministarstvo ima pravo uvida i kontrole u postupku provođenja odobrene investicije na lokaciji korisnika.

11. OBJAVLJIVANJE AKTA

Ministarstvo će ovaj Program i Odluku o usvajanju Programa, objaviti u „Službenim novinama Federacije BiH“ i na web stranici Ministarstva: www.fmeri.gov.ba.

